

## 感恩節經課 ( 巴克禮漢羅/教羅 ) 2011/11/24

### 共同經課-1 申命記第八章七節~十八節

7 因為耶和華你 ê 上帝 choā 你入 hit-ê súi ê 地；hit-ê 地有溪，有水泉，有深淵，tùi 山谷 kap 山流出來；8 是出小麥、大麥、葡萄樹、無花果樹，石榴樹 ê 地，也出橄欖樹 kap 蜜 ê 地。9 你 tī hit 所在食物充足，tī-hia 你也無欠一項；hit 所在 ê 石頭是鐵，tī 伊 ê 山 thang 掘銅；10 你 beh 食到飽，就為 tiòh 伊所賞賜你 ê súi 地，來 o-ló 耶和華你 ê 上帝。11 你 tiòh 謹慎，免得你 boē 記得耶和華—你 ê 上帝，無守伊 ê 誠命、法度、律例，就是我今 á 日所命令你 ê；12 驚了你已經食飽，已經起 súi ê 厝來 khiā 起；13 你 ê 牛羊加添，你 ê 金銀加添，你所有 ê lóng 加添，14 Hit 時你 ê 心自高，boē 記得耶和華—你 ê 上帝，就是 choā 你 tùi 埃及地，做奴才 ê 家，出來 ê。15 伊 choā 你經過 hit-ê 大 koh thang 驚 ê 曠野，hia 有火蛇、蠍 á 蟲，乾燥無水 ê 地；伊 bat 為 tiòh 你 hō 水 tùi tēng ê 石磐流出來。16 Koh tī 曠野，將你 ê 列祖所 m̄-bat ê má-ná 養飼你，是 beh hō 你謙卑，試驗你，hō 你到尾得 tiòh 福氣；17 驚了你心內想講：得 tiòh chit-ê 大 ê 基業是 tùi 我 ê 氣力，我 ê 手 ê 能力。18 總是你 tiòh 記得耶和華你 ê 上帝；因為你得 tiòh 大基業 ê 氣力，是伊 hō 你，beh 成伊所對你 ê 列祖 chiù-choā ê 約，親像今 á 日 ê 款。

### 共同經課-2 詩篇六十五篇 (大衛的詩歌，交與伶長。)

1 上帝 ah，tī 錫安有人 o-ló teh thèng 候你；亦 beh 對你謝所 hē ê 願。2 聽人祈禱 ê 主 ah，見有血氣 ê lóng beh 就近你。3 罪惡 khah 贏我；論到阮 ê 過失，你 lóng beh 赦免。4 你所揀選，hō 伊親近你，Tiàm tī 你 ê 院內 ê，chit 號人有福氣；阮 beh 因為你 ê 厝，你 ê 聖殿 ê 福氣，來心滿意足。5 救阮 ê 上帝 ah，你 beh 用威嚴，秉公義來應阮；你是地極 kap 海面遠遠 ê 人，Lóng 總所 oá 靠 ê。6 伊已經用大權能 há 腰；就用伊 ê 氣力安定 chiah-ê 山。7 Chiah-ê 海 hoā-hoā 哮，kap 其中海湧 hoā-hoā 哮，以及萬百姓 ê 喧嘩，伊 hō in 平靜。8 Khiā 起地極 ê 人因為你 ê 神跡來驚惶；日出日落 ê 所在，你 hō in lóng 歡喜。9 你眷顧土地，落雨灌 ak 伊，hō 伊真肥；上帝 ê 河，伊 ê 水滿滿；你 án-ni 備辦土地，就是替人備辦五穀。10 你灌 ak 田園，滿伊 ê 溝，修平伊 ê 稜；落好 ê 雨水，hō 土地軟軟；其中所發生 ê 得 tiòh 你賜福。11 你用你 ê 恩典做年冬 ê 冕旒，你 ê 路徑 lóng 有油 teh 滴。12 滴 tī 曠野 ê 草埔；山頭用歡喜做帶來 há。13 草埔用羊群做相來穿；山谷用五穀做 moa 來蓋；In lóng 歡喜出聲，來吟詩。

### 共同經課-3 哥林多後書九章六節~十五節

6 但是我講，少種 ê，少收；choē 種 ê，choē 收。7 Ták 人照伊心內所有定 tiòh ê，莫得煩惱，莫得勉強；因為歡喜 thèh 出 ê，上帝疼伊。8 Koh 上帝會 hō tak 項 ê 恩典充滿到 tī lín，hō lín 凡事常常充足，thang 行 tak 項 ê 好事有夠滿滿；9 照所記載講，伊有大捨施，伊有賑濟 sòng-hiong 人，伊 ê 義永永 tī-teh。10 Koh 賞賜種子 hō 掖 ê，也賞賜米糧 hō 人食 ê 上帝，伊 beh 賞賜 lín thang 掖 ê 種子 choē-choē，也 beh 加添 lín 行義 ê 果子，11 hō lín 凡事充足，到有 tak 樣 ê 好心，chit-ê 好心就是託重阮來致到人感謝上帝 ê。12 因為 chit-ê 服事 ê 工 m̄ 是補足聖徒 ê 欠缺 nā-tiāⁿ，koh 續能 hō choē-choē 人感謝上帝。13 In tùi chit-ê 工 ê 經驗來歸榮光上帝，是因為 lín 承認基督 ê 福音來順服，koh 因為 lín 好心款待 in kap 眾人；14 koh in 為 tiòh 上帝所賞賜 lín 極大 ê 恩，替 lín 祈禱，來戀慕 lín。15 感謝上帝為 tiòh 伊講 boē 盡 ê 恩賜。

### 共同經課-4 路加福音十七章十一節~十九節

11 耶穌去耶路撒冷 ê 時，tùi 撒馬利亞 kap 加利利交界經過。12 入一個鄉社 ê 時，有十個 thá-ko ê tú-tiòh 伊，遠遠 teh khiā，13 出聲講，耶穌先生，憐憫阮。14 耶穌看見，kā in 講，lín 去將本身 hō 祭司驗。In 去 ê 時就得 tiòh 清氣。15 其中一人看見家己已經好，就倒 tng 來大聲 o-ló 上帝，16 仆落 tī 耶穌 ê 腳前，來感謝伊；chit 人是撒馬利亞人。17 耶穌應講，十人 kiám 無 lóng 得 tiòh 清氣 mah？hit 九個 tī tá-lóh？18 Chit-ê 別族 ê 人以外，iáu 無別人倒 tng 來歸榮光上帝 mah？19 就 kā hit 人講，起來，做你去，你 ê 信有救你。